

四庫全書

史部

欽定四庫全書

史部

廣西通志卷一百二十

詳校官給事中臣鄧文泮

檢討臣德生覆勘

總校官進士臣朱鈐

校對官中書臣葉蘭

謄錄監生臣田珩紳

欽定四庫全書

廣西通志卷一百二十

藝文

歷朝

四言古詩

喻猛歌

漢和帝時蒼梧太守喻猛以清白為治郡人頌之

於惟蒼梧交趾之域禹貢厥人
島夷皮服大漢維
宗迪以仁德出自中臺鎮於外國鳩集以禮南人

入服簡於帝廷功化畢植

淳熙四年二月既望靜江守臣張栻奉詔勸農於
郊乃作熙熙陽春之詩二十四章章四句以示父
老俾告於其鄉之人而歌之

宋張栻

熙熙陽春既發既舒翼翼南畝是展是圖
嗟爾農夫各敬乃事徃利爾器誠爾父子
惟生在勤勤則及時惟時之趨時不爾違
祁祁甘雨膏我下土習習谷風和澤乃普

往即爾耕惟力之深往蒔爾苗勿倦其耘
于日于夕自遂自達爾心勿忘彼生孰遏
惟天之心矜我下民民不違天使爾有成
既穠既實既堅既好爾穫既周先養爾老
保爾家室撫爾幼穉既迄有年復思嗣歲
嗟爾父老其訓其誠俾務於本惟土物愛
不念其本則越其思所思既越害斯百罹
嗟爾父老其告其喻爾之有生君實覆汝

尊君親上其篤勿忘小心畏忌率於憲章
嗟爾父老教之孝悌孰無父母與其同氣
反於爾心孰無愛敬即是而推烏往不順
嗟爾父老勿替諄諄其未率從警厲其身
告以禍患其使知懼無俾蹉跌以蹈罪罟
惟國之法炳炳其垂使爾知避豈欲爾施
爾或自陷予疚予恫曷使予懷寘于爾衷
於赫聖王敷德流澤布宣弗厘時予之責

咨爾父老助予念茲豈予之助報國是宜
粵以今日勸相於郊乃作此詩以懋爾勞
咨爾父老尚演厥義其諷其歌於鄉於里
俾一其心服我訓言擊鼓坎坎自古有年

題水月洞

元 陳孚

鐵崖萬仞鬼斧所鑿長嘯一聲白雲驚躍

張總戎凱旋詩

并序

明 潘恩

皇帝統極布昭文武薄於嶺海罔不咸賓惟古田

之夷負山保塹歷有歲年敢扇梟風以張寇虐未
馴聲教廼十有五年春正月總戎三峯張君請於
督府率旅徂征申命誓師采入險阻斬獲六十餘
人賊退守諸巢分命偏裨乘夜夾攻批亢擣虛燔
燒積聚聲震林木賊廼奔竄悉稽顙面縛願紓殘
喘以比編氓君廼諭國德威解縛還俘諸酋感泣
要質明神永爲外附於是籍其丁壯凡七千有奇
分隸邑堡刊崖填谷道里通行夏四月癸卯旋師

藩臬諸大夫咸嘉君績屬恩載筆紀其事廼撰詩
一篇詞義淺末不足揄揚厥美聊續凱章云爾

有梟萃止於此叢棘晝伏宵鳴形也斯慝蠢茲苗
民稔於惡德亦共戴天爾心靡極厥心維何饗歆
是宣黑齒髮椎執弩張拳登山溯嶺猿接鳥旋掠
我子女肆彼冥頑黃源之西嘯聚淵藪積豐彌彰
歷年滋久彼美將軍志殲戎首率我征夫風神赴
赴玄幕雲起素甲日輝爰整輕銳授以成規稜威

遐奮電發颺飛諸崑失據視險如夷迺剪荆榛迺
焚巢穴震懾蠻酋請纓羈紲皦日中天矢言弗越
進比諸華嶺外有截在昔孔明七縱與擒庸蜀臣
附實惟攻心張侯舉職曰敬曰謹慎厥終始允矣
國琛

五言古詩

將遊湘水尋句溪

晉
謝朓

既從陵陽釣桂鱗
騶赤螭方尋桂水
原謁帝蒼山

陞辰哉且未會乘景弄清漪
瑟汨瀉長淀潺湲赴
兩岐輕蘋上靡靡雜石下
離離寒草分花映戲鮪
乘空移興以暮秋月清霜
落素枝魚鳥余方翫纓
緌君自靡及茲暢懷抱
山川長若斯

酌修仁水賦詩

梁
范雲

三楓何習習五渡何悠悠
且飲修仁水不挹背邪
流

詠桂樹

南中有八樹繁華無四時不識風霜苦安知零落期

安輯嶺表事平罷歸

唐李嶠

雲端想京縣帝鄉如可見天涯望越臺海路幾悠哉六月飛鵬去三年瑞雉來境遙銅柱出山險石門開自我違瀍洛瞻途屢揮霍朝朝寒露多夜夜征衣薄白簡承朝憲朱方撫夷落既宏天覆廣且諭皇恩博皇恩溢外區憬俗詠來蘇正朔臣天子

擅塲拜老夫絳宮韜將畧黃石寢兵符返旆收龍
虎空營集烏烏日落澄氛靄憑高視襟帶東甌抗
於越南斗臨吳會春色遶邊陲飛花出荒外卉服
紛如積長川思遊客風生丹桂晚雲起蒼梧夕去
舳艫清江歸軒趨紫陌衣裳會百蠻琛賫委重關
不學金刀使空持寶劍還

始安秋日

宋之問

桂林風景異秋似洛陽春晚霽江天好分明愁殺

人卷雲山皦皦碎石水粼粼世業事黃老妙年孤
隱淪歸歟卧滄海何物貴吾身

下桂江縣黎壁

放溜覲前漱連山分上千江回雲壁轉天小霧峰
攢吼沫跳急浪合流環峻灘歆雜出漩劃繚繞避
渦盤舟子怯桂水最云斯路難吾生抱忠信吟嘯
自安閒旦別已十歲夜愁勞萬端企予見夜月委
曲破林巒潭曠竹烟盡洲香橘露團豈傲夙所好

對之與俱歡思君罷琴酌泣此夜漫漫

桂林黃潭舜祠

虞帝巡百越相傳葬九疑精靈遊此地祠樹日光
輝裡祭忽羣望丹青圖二妃神來獸率舞仙去鳳
還飛日暝山氣落江空潭靄微帝鄉三萬里乘彼
白雲歸

巡按自瀕水南行

張九齡

理棹雖云遠飲水寧有惜况乃佳山川怡然傲潭

石奇峯岌前轉茂樹隈中積猿鳥聲自呼風泉氣
相激目因詭容逆心與清暉滌紛吾謬執簡行部
將移檄即事聊獨歡素懷豈無適悠悠詠靡盬庶
以窮日夕

湘川新曲二首

杜易簡

昭潭深無底橘洲淺而浮本欲凌波去翻為目成
留願君稍弭楫無令賤妾羞

二八相招携採菱渡前谿弱腕隨橈起纖腰向舸

低自解看花笑憎聞染竹啼

蠻子歌

劉禹錫

蠻語鈎輈音蠻衣斑斕布熏狸掘沙鼠時節祖盤
瓠忽逢乘馬起恍若驚麕兔腰斧上高山竟行無
舊路

南溪

李勣

元巖麗南溪新泉發幽色巖泉孕靈秀雲烟紛崖
壁斜峯信天插竒洞固神闕窈窕去未窮環迴勢

難極玉池似無水元井昏不測仙戶掩復開乳膏
凝更滴丹砂有遺址石徑無留跡南眺蒼梧雲北
望洞庭客蕭條風烟外爽朗形神寂若值浮丘翁
從此謝塵役

越亭二十韻

元晦

乏才叨八使徇祿非三顧南服頒詔條東林證迷
誤未聞述職效偶脫囂煩趣激水濬坳塘綠崖歌
磴步西巖煥朝旭深壑囊宿霧顙氣爽衣巾涼颺

輕杖屨臨高神慮寂遠眺川原布孤帆逗汀烟翻
鴉集江樹獨探洞府靜恍若偃佺遇一瞬契真宗
百年成妄故孱顏石戶啟杳靄溪雲度松籟韻宮
商駕霓勢翔遡津梁危約架濟物虛舟渡環流馳
羽觴金英妒妝嫵茄吟塞壘迥鳥噪空山暮悵望
麋鹿心低徊車馬路懸冠謝陶令褫珮懷疏傳遐
想蛻纓綈徒慙卹襦袴福盈禍之倚權勝道所惡
何必棲禪關無言自冥悟

南獠詩

宋 歐陽修

洪宋區夏廣恢張際四維狂孽久不聳民物含春
熙耆稚適所尚游泳光華時遽然攝提歲南獠掠
邊陲余因叩村叟此事曷如斯初似却人問未語
先涕垂收涕謝客問為客陳始基撫水有上源水
淺山嶮巖生民三十室聚此天一涯狠勇復輕脫
性若鹿與麋男夫不耕鑿刀兵動相隨宜融兩境
上殺人取其貲因斯趕趕來此寇易為羈鼠竊及

蟻聚近裏焉敢窺勢亦不久住官軍來即馳景德
祥符後時移事亦移四輔哲且善天子仁又慈將
軍稱招安兵非羽林兒龍江一牧拙邏騎材亦非
威惠不兼深徒以官力欺智畧仍復短從此難羈
縻引兵卸甲嶺部陳自參差鋒鏑殊未接士卒心
先離奔走六吏死

初在懷遠軍卸甲嶺殺傷范禮賓王崇班等六人落陣死

明

知國挫威自茲賊聲震直寇融州涪縣宇及民廬
燬蕩無孑遺利鏃淬諸毒中膚無藥醫長刀斷人

股橫屍滿通達婦人及孳產驅負足始歸堂堂過
城戍何人敢正窺外計削秦疏一一聞宸闡赫爾
天斯怒選將興王師精兵二萬餘猛毅如虎貌劍
戟凜秋霜旌檠閃朝曦八營與七萃豈得多於茲
外統三路進小敵胡能為前驅已壓境後軍猶未
知逶迤至蠻域但見空稻畦搜羅一月餘不戰師
自罷荷戈莫言苦負糧深可悲哀哉都督郵無辜
遭屠糜

昭州都曹皇甫僅三人部糧人
尚遭蠻賊掩殺及害夫力千餘

咤咋計不

出還出招安辭半降半來拒蠻意猶狐疑厚以繪
錦贈狙心詐為卑戎帳草草起賊戈躡背揮我聆
老叟言不覺顰雙眉吮毫兼疊簡占作南獠詩願
值米詩官一敷於彤墀

龍隱巖

李師中

春波飽微綠斗柄涵虛明方舟貫巖腹鷺鸕相酬
鳴仰窺穹窿頂宛轉百怪呈僅餘鱗甲碎不見頭
角擰下闕清泠淵演迤萬頃澄但同魚鳥叅勿遣

蛟龍驚扶苔撫竒篆倚棹看題名三將標殊勲自
與山不傾誰歟贅小禁政恐山靈嗔南洞更幽絕
仙佛依崢嶸太虛可為室豈復資藥楹乳泉助茗
椀中有冰雪清何須驂鸞去此即白玉京鼎來不
速客抱琴忽逢迎愛此無絃曲巖溜同一聲為君
洗塵耳喚我詩魂醒祇恐白衣至好句無由成

藤州江上夜起對月贈邵道士

蘇軾

江月照我心江水洗我肝端如徑寸珠墮此白玉

盤我心本如此月滿江水湍起舞者誰與莫作三人看嶠南瘴癘地有此江月寒乃知天壤間何人不清安牀頭有白酒盎若白露團獨醉還獨醒夜氣清漫漫乃呼邵道士取琴月下彈相與乘一葉夜下蒼梧灘

仙宮嶺

鄒浩

曉雲生嶺端遮日成清陰炎氛遽辟易興逸安能禁仙宮風塵表高高百千尋石路上曲折健足猶

難任綽約兩仙子雙鬟坐沉吟巫覡意何許門窻
藤蔓深樵叟向我言自古傳至今去州五十里有
洞鬱森森陶家李家女年各勝巾衿恍惚若逢遇
相與登崎嶇一朝作蟬蛻英魂不墜沉鄉人共祠
之髣髴來顧歆水旱禱輒應民吏同所欽此宮乃
行宮春秋薦誠謚言已叟仙去四望祛煩襟榮山
直南聳龍嶽山朝壬越王連佛子密山秀孤岑回
環萬峰巒插雲皆玉簪滔滔兩川流會合通梧潯

漁舟糝木葉城郭幾突黔虛徐韻長松飛鳴集珍
禽須臾烟靄青迢遞浮祲祲變化紛見門飲酒時
一斟我罪貸五鼎我軀重千金雖居瘴癘鄉肯使
瘴癘侵囊衣完舊裾匣劍存新鐔氣聽謝耳力誰
到無絃琴子期久冥漠天地為知音中和王度新
祈招詠悵悵賜環諒匪朝聊以寫我心

飲桂州酒示柄

好酒如好人雖久略不變炎涼互推移氣味愈可

見豈若茅柴漿多為衆所賤舉杯吾得師足以警
閒燕

獨秀山讀書巖

沈晦

老鶴下遼天昂昂在林表霜毛臨野人逸氣秋天
香矯矯顏始安不受冠帶繞清真自嵇阮一醉萬
事了讀書空谷中生芻白駒皎神仙問嶺岬弓彎
天宇小豈無素心人幽眎共清曉能遠在城闕鐘
磬出林杪試令栽桃李照海清嫋嫋長哦五君咏

極目送飛鳥

題容州學育才堂

李綱

治世崇儒術膠庠萬宇臨自從馳羽檄誰復念青
衿賢守來南紀宏規肇泮林飛輦開講席鼓篋拂
書蟬採藻繡江水撫絃都嶠岑潛消戎馬氣有懷
飛鶚音洙泗道非遠朱張賢至今大器在東序追
琢且南金常袞閩風變文翁蜀化深願來遊學者
仰副育才心

題勾漏洞

抱病卧雲海夙夕負深恐寬恩聽旋歸何啻丘嶽
重問津勾漏洞山散策寶圭洞羣峯羅翠屏環合無
缺空石盤與丹竈遺迹可捫弄仙遊感初心幽賞
協清夢却來窺宸章寶氣橫蟬蛩真行雜草隸筆
勢極翔動大小飛白書飄灑縈舞鳳共惟睿知姿
多能本天縱妙蹟藏名山俾與萬世共林巒增炳
煥神物各護擁惜無深巖屋蔭覆示崇奉何當鳩

良材為葦傾壓棟妖氛不指狼中原戎馬關九廟
未奠居臣子咸憤痛豈知炎荒中奎畫得瞻諷至
哉博大言粟麥固異種天帝及諸佛百神共妙供
竊于翰藻間窺見神心用源流此中來基岑自興
宋稽首歸琅函斐然成善頌

屏風巖

張孝祥

高崖劃天開仄徑通乳穴隈堆青螺髻端嶺白玉
闕外有虎豹蹲中恐蛟蜃蟄東縈俯雷電西出挾

日月萬壑來悲風六月不知熱但覺駭心目未易
記筆舌平生山水趣嶺海最奇絕洞府二十四未
厭屐齒折晚乃遊此崑餘地比僕妾同來六七士
嗜好頗相埒舉酒酌山神慰汝久湮滅

八桂堂

孫覲

橘中隱商顏桑下蔭羽葆古人日已遠遺跡今未
掃英英八桂林屹立表衆草名隨五柳傳壽待三
松倒南堂駐金節仗劍收蠻獠駢立萬馬獵獵

卷千幃元戎領客來小摘羞澗藻醉纈亂繁花移
來插晴昊

七星巖

十載汙修門簪橐侍帝垣五雲深莫窺衆星拱以
繁一坐牘背書身落海上村山川發餘想鐘鼓眩
昔聞星圖煥斗極兩兩錯地文今日復何日乘槎
造天閣日月起可挾參井立能捫誰當揭其柄為
我酌瀛尊

題象守坐嘯堂

治國如烹鮮馭民如牧羊薰狐廬自焚投鼠器必
傷曹侯百世師獄市寄全齊天下本無事庸人勿
擾之危機蹈潛弩惡吏冠唬虎飛走豈不高搖足
墮網罟使君古大丘妙割無全牛班春千騎曉長
嘯萬壑秋棠陰日轉午風簷翠蛟舞問道舍蓋公
誦詩選何武渭水占熊羆萬里竺旻夷試磨南山
石更草中興碑

冰井

任詒

驅車出東門弭節訪冰井寺古棟宇傾碑折苔蘚
屏源泉池中生瑩淨可鑑影命僧旋汲之入口勝
霜冷試烹白雲茶碗面雪花映清泠滌煩襟潤澤
勞瓶綆可以濯我纓悠悠脫塵境

興安乳洞有上中下三巖妙絕南州率同僚餞別
者二十一人遊之

范成大

山水敦夙好烟霞痼奇懷向聞乳洞勝出洞更徘徊

迴雪林縞萬里東風知我來華裾繡高原故人紛
後陪繫馬玉溪橋嵌根豁崔嵬蕩蕩碧瑤宮冰泉
漱牆隈芝田溉石液深畦龍所開勾我一掬慳頻
此炎州埃仍呼輪袍舞醉倒瑞露杯但恐驚山靈
腰鼓轟春雷薪翁雜餉婦圍視歡以咍茲巖何時
鑿閱世幾劫灰始有此客狂後會真悠哉南遊冠
平生已去首猶回歲月可無紀三洞俱磨崖會有
好事者摩挲讀蒼苔

鐮背

在興安縣秦史祿所作也迎海陽水壘石為壇前銳如鐮衝水分南北下為湘灘二江功

用奇偉余交代李德遠嘗修之

導江自海陽至縣迺瀾迤狂瀾既奔傾中流遇鐮背分為兩道開南灘北湘水至今舟楫利楚粵徑萬里人謀效天造史祿所經始無謂秦無人虎鼠用舌耳紫藤纏老蒼白石溜清泚是間可作社牲酒百世紀修廢者誰歟配以臨川李

七月旦日晚登湘南樓

張栻

文書稍去眼日夕進微涼高樓一徙倚清風為我
長漁父蔭深樾歸人度浮梁仰看河漢明俯視羣
山蒼平生會心處於此故難忘舊聞水東勝巖巒
發天藏豈無一日暇勇往聊徜徉民瘼未渠補况
敢懷樂康天邊雲物佳似復為雨祥秋成倘可期
歲晚或自強當從農家鼓一歷水雲鄉

八月既望要祥刑護漕游水東早飯碧虛徧觀棲
霞程曾龍隱諸巖晚酌松關放舟過水月洞月

色佳甚逼夜分乃歸賦此紀遊

灕江即湘江濺濺清見石其東列羣峯秋色碧復
碧日出霧露收草徑上逼側憑欄揩望眼已足慰
疇昔更窺竒穴勝創見爲驚惕如何數里間竒觀
相接迹寬同厦屋深劃若巨靈擘日月遞光景風
雲變朝夕石橋幾年成乳竇時一滴神龍舊隱處
仰視多辟易蛻迹凜猶存隱隱印霜脊下有澄湫
深餘波漱蒼壁往者已仙去來者此其宅薄晚扣

松關風過聲索索聊麾車騎退容我且散策却望
訾家洲輕舫度前磧回首烟樹林已復挂蟾魄宇
曠淨餘滓羣物被光澤河洲寄遐思空巖皎虛白
清輝可一窺水色相激射天邊與川上亭亭如合
壁居然廣寒遊不用假六翮班坐衣微瀾晤賞共
佳客因之想千載詎有今古隔簫鼓歸夜闌觀者
粲城陌徃徃羅杯拌班班見般核諒因年歲豐人
意少舒適視爾意少舒於予亦忻懌

次韻南軒先生榕溪閣

閩山谷
所名

吳 儆

紹聖用事臣黨與紛相膠當代幾忠良一朝咸黜
幽太史坐直筆愈黜名愈休消長關否泰天意匪
人謀累臣誰司城獨為景物留當時西復南萬里
不停輶誰知百年定欲起九京遊積莽新陳迹寒
泉薦冰甌想當千騎臨水木寒蕭颼我公今伊傳
茲焉少夷猶炎方凋瘵餘公來今已瘳榕溪兩甘
棠千載誰劣優太史後凋松公如巨川舟

題壺天觀

梁安世

宣政喜邊功隆兌築州縣程公自名巖刻石記所
建得既不償費中興棄不繕誕謾磨崖辭當日妄
誇銜英英石湖仙改作壺天觀壁間三大字莊重
如我弁詩文鸞鶴音筆勢龍蛇變登高瞰洞戶灕
水澄如練勝槩聳靈臺遐觀起三歎玲瓏二十四
妙墨鐫題徧我來為拂塵端若侍顏面邦人頌遺
愛壽骨癯且健今坐玉麟堂安得使之見

曾公巖

劉克莊

廣室內嵌空層峯外崔嵬仰視駭懸石俯踐愁滑
苔古竇風肅肅陰澗泉洄洄飛梁跨其間上可陳
樽罍愛涼復畏濕當暑重裹來名巖者誰歟兄固
弟子開憶昔建中初國論幾一迴惜也祖荆施卒
為清議排至今出牧地姓字留蒼崖躊躇增慨歎
日日禽聲哀

慈氏閣

建閣五季時丹碧見層累吾行半區中鉅麗莫能
比想方營綜時伯心極雄侈但思窮耳目寧論竭
膏髓一朝陵谷變飛電掃僭壘湘波日夜流不洗
爭篡耻惟存浮屠居願力久未毀夕陽弔陳跡危
檻聊徙倚遙憐下界熱高處涼如水若非逼嚴鑰
坐待鐘聲起

伏波巖

懸崖萬仞餘江流繞其趾仰視不見天森秀拔地

起中洞既深豁旁竇昏奇詭惜哉題識多蒼玉半
鏡毀安得巨靈鑿永削崖谷恥緬懷兩伏波往事
可追紀銅柱成浪泊樓船下湟水時異非一朝地
去亦萬里山頭博德廟今為文淵矣謂予詩弗信
君請訂諸史

書堂山

子厚文章宗仲塗豈後身不肯作崑體寧來牧湘
濱誅茅翠麓巔日與書卷親划去五季衰挽回六

藉醇歐尹相繼出孤唱由伊人風流喟已遠尚喜
棟宇新千峯高叢叢一江碧粼粼禽鳥墜草樹纖
悉几案陳澗泉既可汲山木亦可薪熟讀壁間藏
痛掃毫端塵最哉山中友勿厭泉石貧

中秋湘南樓餞張昭州

臺使選良牧詔下帝曰俞高牙植華艦餞者來傾
郭明月滿麗譙寒光映尊壺桂人願少畱昭人望
疾驅一室可為政况乃有國都嶺民日以耗丁口

強半無洋洋紫雲詔侯其勒座隅道鄉游息處暇
日披榛蕪鄙拙添投分臨風獨踟躕頗念友離索
寧論鬼揶揄何由叩鈴閣百榼傾兵厨

龍隱洞

先賢評桂山推爾居第一豁然碧瑤戶夾以雙玉
壁中有無底淵黑浪常蕩清涼當剖判初倍費造
化力雷嗔斧山開龍怒裂石出至今絕頂上千丈
留尾脊寧論兒女子壯夫股為栗我來欲題名腕

弱墨不食摩挲狄李碑文字尚簡質令人未知貴
後代加寶惜汨流上駭舟久遊學蕭瑟巖室寬如

家迴樵聊惕息

狄武襄公平蠻碑李
師中待制宋頌在焉

全州觀風樓

陳峴

江源發蠻荒來與湘灌遇交流趨城隅清映日東
注羣山半楚越馳驟若競赴譙門百步南樓堞此
雄踞觀風久標名棟宇初改故極目渺塞嶺蔚起
矗雲霧千里聳翠碧衆水橫練素古寺帶林薄漁

艇依野渡村墟互隱見風烟自朝暮東西亘井絡
碁分雜營戍偶值豐登年樂此保生聚秋風黃花
天良集盛替屨肴觴固匪虔藉此山水具登臨方
興深諸君幸少駐

送來賓宰

戴復古

君作來賓宰聽我說來賓蠻俗無王化當為行化
人有民無租賦租賦出商旅逐利遭重徵商旅亦
良苦能放一分寬可減十分怨不愛資囊索但愛

了支遣民窮賴撫摩官貧俸不多但得百姓安俸
薄其奈何勿謂朝廷遠官職易遷轉律已貴廉勤
御事要明斷自縣辟為州指日為太守須知早歸
來瘴鄉不可久

十一月九日携二豎子邀單秀才步出古觀之西
北求鄒侍郎忠公寓舍於拾青閣故基

徐俯

履霜頗强健晨興恣所適兩兒休籃輿呼客同蠟

屐危橋出隘巷憑高聊物色蒿然但林莽蕪廢長
荊棘井竈那復遺江山依舊碧要知千載下懷賢
求所歷

虞山

方信儒

西風攪桂樹落日明楓林遊子懷歸期予悲渺登
臨虞山一何高湘水一何深英皇僅枯塚寂寞薰
風琴我欲奏古曲俗耳更哇淫古器不可見聊作
相思吟相思長相思相思無古今一歌衆鳥聽再

歌萬籟暗推手君勿歌有酒且孤斟落落此時意
寥寥千載心五絃母容絕四海誰知音

癸水亭

曾宏正

危亭倚嵒隈聲名叶地讖時浮桂藕香永絕戈甲
稊敗柳裊烟絲枯荷立霜柄呼童理吳榜日月數
乘興

贈邕州趙守

崔與之

大厦開朱明物態豐且碩薰絃發新奏生意轉無

極間氣清而和融結賦有德碧梧挺幽榦曠度漫
九澤富哉學古胸仁義供服食渾樸希世珍外溫
而內直驂騶開道路聲光日斯赫九關通籍初南
來墜雙舄片心清徹底杯水餞泥軾京兆入幕賓
去天不盈尺佳最入聰續行行陟文石邕為五管
雄地控西南域專閩難其人弄印無以易袖却經
綸手天邊樹牙戟猩獠叢篁中深棲而屏息夜月
照銅柱警囊聲寂寂邊人解帶卧危地成樂國屏

風御墨鮮早晚來召驛
媿我樸樾才潦霧甘遠役
題坐遇知己孤根費培植
崧高生申甫好語誼井
陌碧油塞雲端阻莫陪
賀客歌詠淇澳詩清修如
圭璧他年玉班頭蒼髯而
赤鬚

賓州

元
陳孚

賓州大如斗青林掩蒼靄
亂石熊豹蹲繫繫漱江
瀨野姬碧裯聚墟擁野外
青筠羅米鹽飄飄雙
繡帶日晚投古驛酸風不可
奈綠竹亂生枝離披

影如蓋瘴雨飛為塵鵲聲噦噦府僚跪庭前對
我各一慨濁酒強為飲旅魂如可酌故園何日還
白雲繞吳會

過清湘作

李 巖

昨經衡永間田野多荒蕪居民竄山谷所至皆虛
廬山深聞賊鼓警戒憂不虞今朝抵湘城眼明人
意舒風烟接村落川原散耕夫青紅間花柳山色
開畫圖胡為百里外治亂乃爾殊桓桓崔將軍年

高雪生鬚文功與武績歷歷皆可書王君人中龍
及瓜初此趨石侯復李侯經綸材有餘古稱治在
人比言良不虛我從日邊來遠使天一隅名藩閥
人多公齋曉星疎惜無薦賢書弗得分龍魚作詩
紀佳政庶可聞上都

送普顏子壽赴廣西憲幕

明
劉基

離維荆衡南迤邐走蠻徼民風雜猺蠻地勢帶蒙
詔迢迢商周前風水絕纖覈後王務廣土懷柔倚

攻剽羈縻非本情疲疴復誰療大明侔日月幽裔
靡不照化育之所加欣榮及蓬藿憲府繩百司選
擇自廊廟偏方異習賦性實同調培養自殊途
激揚貴知要願言崇令業以繼南國召

藤江諸勝

富禮

峽口漲晴嵐秀色渥如赭天寒山鳥啼月白林猿
下仙人讀書臺石磴哀湍瀉

斷崖如削鐵開闢自太古江風西北來斑斑濕秋

雨扁舟晚經過中流欲掀舞

東山夜鴻濛夜色白如晝明月斗牛間江動金波
溜步歸松徑深清露濕衣袖

江流島嶼孤亭亭聳高髻螺堆晚霧濃翠滑春雲
細徘徊顧清影澄江去無際

書黃賀州平蠻事後

胡翰

荆楚綿百越襟帶極遐裔連山限車轍外薄海無
際風氣何紛龐羣蠢動相噬古雖郡縣置畫地出

租稅負險恒自固犬牙植形勢聚若蜂螳來散如
鳥鼠逝堯仁不能覆徃徃思一難懸兵萬里外暴
露蒙瘡癘亦有內齊民註誤混狂獬巢穴牢弗破
根本先自殪天遺槃瓠種出人民患害聖哲戒不
虞窮討諒非計皇靈冒下土赫赫火俱厲日月所
出人有生盡懷徠賓賀崎嶇間芭蕉久聯締遣吏
得黃侯為國開信誓王師不血刃緩頰下推髻列
功奏天子璽書遠頒賚賜以大銀盃副之金帛對

嶺海數十城安得百其喙我聞范史言此屬非難
制力弱校弄薄非可羌戎例漢廷慎擇守祝良復
誰繼侯今鬚盡白侯心甚宜弟分符浙水上應念
東人勸蠻獠尚有知東人敢忘惠作詩勸不隕庶
以示來世

全州道中

夾道松栢千株
前守章復所植

王 偁

全南走百里碧澗緣幽岑躋險屢得勝曠望清煩
襟道旁茆茆松誰是甘棠陰間有章大夫昔年茲

撫臨政循俗丕變世遠澤尚深顧茲千植繁菊沃
猶至今天長日色薄風靜雲滿林我行念徒侶苦
被名跡侵畏影且息蔭避喧聊洗心據牀久睨傲
思奏伯牙琴知音何寥哉猿鶴空哀吟

河池險路

藍智

連峯入河池險路徭人村喬木盡參天白日為之
昏上有高石厓下有清水源蕭蕭篁竹叢落日聞
哀猿職當觀民風載驅隰與原瘦馬嘶不動瘡童

行似奔山川秋氣高鷹隼宜飛騫俯念遠人思仰
慙父母恩東郊有茆屋時稼繞衡門攬轡倦行役
徘徊思故園

太平謁先師廟

黃福

聯銜昌秋雨出郭行晨香禮竟尼父廟延登庠序
堂白髮論經史青衿羅酒漿我雖不嗜飲荷茲來
意長文談有益友仁化推虞唐雲山翠律翠霜橘
纍垂黃顧茲嶺外俗思我齊東鄉歸來坐精舍一

詠聲琅琅

寓憑祥縣有懷

憑祥山縣幽環抱多溪嶺原草通行堦庭梧蔭金
井魚出清溪綸獸來曠墅寔廳罔事喧囂門不接
馳騁日邊使遠來海外星雙耿青牛邑宰迎白髮
縣君請共寓倏經旬所話咸骨鯁入夜皆忘眠生
對青燈影藜蠶何不臣虎旅今爰整動如風雨聲
止如山嶽靜擬看弔伐師壓破兇殘境納款多渠

魁溪蘇咸引領不聞士卒勞唯知糧餉省捷書報
須臾天顏開俄頃偉哉開拓功絕勝彬與猛伊誰
之力歟妙算有所秉

燕清八詠

錄四
并序

李 棠

余至廣西之明年視公署後一小軒頽然將壓欲
葺之以便燕息之所時寇起歲稔輟環四方無虛
日故未暇及越壬申秋寇平且得歲民用乂康余
樂甚因命工葺之揭其楣曰燕清公事之餘日倘

徻其間軒前植物八品玩之為樂嗚呼民未安居
樂此得乎民既安矣而猶戚戚焉亦非予之所安
故物各賦一詩以寫其樂

松

質性本巖壑何年植軒墀栽培豈人力亦荷乾坤
私昔聞出蕭艾今已干雲霄嗟彼蒲與柳經秋忽
先萎顧惟堅貞操青青閱四時願言託幽契歲晚
相因依

竹

種竹我來初森森已成叢
悵焉感時序浪迹慙飛蓬
所賴天降康豐年及罷農
移牀坐層陰匝地光玲瓏
高歌激商灝習習來清風
邊氓既云樂久客何憂冲

桂

何人得仙種來自清虛府
植我庭階前繁陰滿窓戶
我適無事時開軒日容與
清秋發天香盈盈金

粟吐媚學來俊髦平步可掇取昏蒙起瞻思迢遙
隔風雨

菊

種菊滿籬落杖策時一行匪徒事遊豫愛此秋氣
清引觴注醺醖泛泛黃金英取醉亦有適豈必制
頽齡有懷時激烈長歌振林垞緬思靖節翁悠然
千古情

桂山詩

韓 雍

桂山何奇哉峰巒起平地星羅數百里像物非一
類列柱擎空高圓屏障天翠尖分筆格巧稜削劍
鋒利海螺爭獻新玉筍並呈瑞重巖垂萬象深洞
容百騎河變梁猶存關陡門未閱還多怪異狀物
類無可譬石鱗瀉寒泉清響更幽致丹青筆雖妙
圖畫良不易想當開闢時清濁各奠位精華妙凝
結磅礴隱深粹洪水滔天流壅土日消墜歸然不
可動參雜如布置儒先歷覽多載籍有題識仙都

雁蕩景角勝須在次始知寰中山奇絕更無二所
惜在荒遠世人少瞻視我慙本書生承乏當閭寄
提兵靖百越黽勉幸成事性愛山水遊羈絆弗能
遂故茲佳勝境六載始一至駭目驚心神欲去還
默記豈徒玩物理亦欲長仁智况逢休明時德化
廣漸被九州安耕鑿四海息烽燧乘間此遊觀冠
蓋總賢使相與片時樂感激知所自走筆題新詩
磨崖刻深字非追浯溪頌聊補桂林志

題行臺喜雨堂

提兵靖南蠻三載兵始收吾民尚凋弊所事惟田
疇如何耕植時未見雨澤流地坼苗漸槁比屋聲
啾啾且聞中原地旱亦傷來年中原流徙多北寇
懷奸謀一或歲大凶所在生百憂我忝大夫後與
國同戚休德涼召時災恐懼當禱求聖主重民命
祀神禮先修詔未臨海邦氣已潛通幽果然賜甘
澤旬日遍九州枯槁咸回蘇百穀定有秋酷暑亦

淨洗炎荒涼颼颼聖德與天通民亦知所由兒童
競鼓舞父老齊歌謳小堂適苟完懽感惟我尤羣
公携酒至且有新詩投扁以喜雨名酌以黃金甌
我愧不能當題詩紀皇猷

成化七年秋八月自梧州出巡至平樂歷諸險灘
憫舟子勞甚感歎有作手書於郡學示知音者

樓船發蒼梧江水何湯湯清灣不時轉石灘險非
常顯伏羅虎兕參錯森劍鋸砰轟地出雷沸騰釜

揚湯夾岸山壁立澗谷緣其傍深陡力難為無路
兼無梁引纜既弗能操槳亦有妨篙師極力進羣
叫如發狂道甫逾半千灘數百十長繼旬始能達
疲憊已莫當僱直僅足食曷有贏餘糧所幸得無
虞勞損不自傷長江有巨賈連舟監危檣開帆趁
好風破浪飛汪洋無煩役心力倏至千里疆得售
重利還里閭誇富強一時或不戒傾摧見災殃乃
知覆載間人事誠渺茫淹速雖靡同夷險未易量

因之發警悟省已益不遑盡瘁固所甘幸至非所
望循理聽自然終始永不忘

哀平南為司訓郭君妻作

陳政

平南古封邑山水天下奇誰知山水間訪故有餘
悲結髮事君子燕婉及茲時君領平南訓妾當從
所之嘉合諒不偶偕老復奚疑詎意方盛年世途
生嶮巇胡藍哄豺虎咆哮薄城池鴛鴦忽驚散倉
皇各東西孩提在中懷呱呱益淒其鋒刃轉陵脅

死生從此辭白璧苟以汙雖生亦奚爲厲聲叱兇
暴濺血沾裳衣秋霜讓凜栗烈日同光輝哀哉若
女英展也烈士規聖朝重化理激薄良在斯綸綍
出中禁龍光賁天涯一死安足惜千載芳名垂

慶遠南山

孔儒

古粵宜山郡孤城豁洞中封疆至荒遠物理還雷
同水出千蟠澗山羅萬疊峰南山尤秀麗佳氣常
鬱葱峻壁宕堯起幽巖曲徑通蟄通臥石窟野鶴

巢雲松巖底軒宏處炯然神仙宮吟詩萃墨客携
酒來山翁榕烟落硯沼涼吹入荷筒林麓民居衆
田疇稼穡豐梵宮起微翠金相凌虛空一望景無
盡千迴興不窮我來守斯土禦寇時興戎民憂常
切切人事更匆匆二載始一翫寸心方從容剗苔
看古刻遊覽皆明公遺興尚灑然筆力多豪雄覽
畢坐石牀分明古崆峒酒盡應忘醉詩成愧未工
山僧愛佳客脫粟烹早菰歸來日云暮玉兔生山

東

自龍州至憑祥道中

湛若水

癸酉王正月望舒忽已圓登望憑祥陸暫辭龍州
船杭葦始斷港前旌出回巒隱見萬山中初翳疑
無門轉忽或有通上與青空連灑落觀羣山芙蓉
秀晴烟烟與山俱淡心與境相關條然若有得殊
土元同天

送胡汝重廣西散賞李貽教限韻

魯鐸

行賞下南服揮指三萬舸遠別何足云離亭笑方
嗟君才文武無所投無不可南師亦有言何以衣
食我惠賞容未沾乃復望驍果垂索向使君揚眉
趨道左時雨均皇仁沛然非瑣瑣行須使三陟皆
令靜烽火

行縣出入賊巢感懷

桑悅

投荒幾萬里歎美太寥廓龍城真小垵半刺等飄
泊壘延隘尙險慄猺獠獠惡偏駕高逾頭利鏃

淬毒藥深箐工埋藏起塘專剽掠我恒巡邊鄙誰道
勝沙漠過處屢潼關登時幾劍閣迴迴起驚疑在
在饒螫蠱尋常水若石盡是溝與壑淺寨足汙瀦
空城殊落寞腰慣負湛盧手亦便繁弱昏眠目睹
刃靜坐耳聞柝陰寒晴閃煥宇宙如病瘡尖峯堆
艾炷炙地野火灼苦奈氣候異因茲瘴癘虐世棄
人何尤百感付一噓憶昔少年日六經供咀嚼至
味稍染指斗柄易斟酌小試之近效俯仰多愧作

承前尋墜緒啟後敢妄作探宋衍淵源補漢平穿
鑿星纏任羅胸月窟且著脚欲駕瑤池驥穩跨揚
州鶴釣天覲重華契搜相唯諾銀漢濯琅玕薇垣
植蘭葯咳唾墮虛空萬象俱洗淪那知老將至自
量學不落誰能亮初心許國忍獨樂

那演村

陳璣

四境無人烟有者在巖谷忽見相驚顧來前還欲
縮匍匐不敢起咿啞訴且哭連年兵亂間五回遭

殺逐有妻今屬誰有子還處獨逃形竟無所得此
稍溫煥何時天日開英華發槁木掩淚不能荅慙
我司民牧

桂門行

易宗周

南行度桂門山路多巉岈况復帶修嶺四顧皆雲
烟樹木嘉以繁石磴莓苔鮮山鳥夾路啼野雉飛
過前谿谷少人家僕夫難息肩驅車發長歎將行
復留連翻思太行險更憶蜀道難河內有人去巴

川有人還桂門雖云遠較此未為艱惜苦多風雨
陽光不照山陽光照有時吾且開笑顏

贈龍道亨之平樂

鄒守益

敬義昭前楹在子已聞命毫釐察臧否天壤分殃
慶請看檻前花誰是歲寒勁相期朱陵峯層雲發
青磬

坐嘯籌邊樓長吟天繪閣華夷皆赤子未用勤遠
畧聖王師放勲魚鰲且咸若贈子長江水萬里騰

寥廓

初至全州

顧璘

跋涉既累月始聞及清湘長風捲舟幕忽見湘山
蒼黃髮數老叟迎予具壺漿面色頗鰥瘦草際各
蹌蹌拜起問生理輒言因兵荒云望使君至冀免
溝壑殃我聞老叟言垂涕意彷徨比歲牧梁宋兵
戈劇流亡逮此越萬里民瘼乃同方憶昔始觀國
徒行不齋糧皇輿非改轍惠澤恒汪洋閔茲豐儉

故所罪吏非良噬膚遂及髓割肉救瘡瘍天高不
能愬仰失日月光矧予既朽廢豈有仁風揚登途
入城府惻惻心自傷

至灌陽平賦作

我聞黃虞民罔識官師名老翁被素髮壤歌如孩
嬰季世廣法令民心始忡懔馬牛急租稅雞犬紛
鬬爭茲邑苦窮僻層巘紆荒城山深吏治猛里胥
日縱橫執熱不以濯煎膏難及明府帖增新役賦

籍何由平水枯網罟亂孰使魚不驚投筆坐長歎
淚下霑縷纓

俟賢亭

古人不可作高亭復誰俟赭衣供井稅寂寞循良
事白日照閭閻憑高墮清淚春風雜花底何因見

馴雉

登春臺

高臺倚青嶂下顧城郭間茆居散花竹雨餘春意

閒相將理農務朝耕暮來還寄言長民者勿使惠
愛慳

濬柳山泉

清湘有寒泉乃在北山頭靈竅本神鑿化原乘氣
浮昨日泉水涸今晨泉水流借問通塞故云屬無
人謀所以大易旨蒙者貴敏求願言鑒茲泉夙夜
勤厥修

弔宋刺史柳仲塗書院廢址

昔賢政多暇學道恒山居遺構儼像設流風激鄉
閭時代屢遷易勝觀鞠為墟居人伐嘉樹野火灰
堂廬有作不肯述益歎今人疎始聞慕芳躅既來
乃重歎指顧亭臺迹歎息經營初林澗有餘蹟曲
水有空渠誓將理荒穢心達力不如勗哉同官客
勿俾初願虛

考胡致堂先生流寓吾全歲月景仰不已遂形於
詩

蔣冕

先賢經歷處草木有輝光偉然千載士況為吾致
堂任重且道遠抑陰更扶陽危言數十上惓惓為
三綱忠直不少徇遠謫甘炎荒中年奉父命省家
來清湘嘗遊漱玉洞一飲累數觴酒半逸興多揮
毫掃琳琅至今木天上遺書尚秘藏手抄還口誦
蕉萼見羹牆翹首仰名德寤寐耿不忘何當奉公
神俎豆臨郡庠

出鎮南關

關外即
安南境

潘希曾

崔嵬分茅嶺鎮南扼雄關持節始入交山路何鬱
盤喬林映前旌鳴騶歷層巒綸命自天下恩光回
日南道路盡膜拜冠帶爭駿奔語言雖假譯文物
亦可觀藐茲溟海壖聲教古所漸

勸古田諸生歸學詩

唐 胄

依依古田縣叢莽萬山麓金甲初洗腥瘡痍嗟未
復草園學久鞠省寄空廩祿轡馭勞直指驕頑聊
蹀局適有良師來統歸振新鐸懷居久便利驅之

魚上竹念險業寧棄有懷痛欲哭感予甚不忍禁
法難回曲治理政教併神聖貽猷畫趨避情可任
尹尉辜何獨勞戒助騎衛窮乏假館穀且勉為一
行氣壯心自豁劍仗氛妖開文光颺颺縮趨丈趨
經橫歸告時休沐嗟唐吉安丞歡笑入夷落清歌
與簫吹蠻俗為變革化予夷未幾遣子再入學藍
衫舞春風酋父側笑躍今去大絃歌刁斗聲應伏
遶垣擺嶺平取徑都狼速笑歌長去來忠信無蠻

猶憂戚天汝成居夷孔亦欲

粵右督餉

汪必東

永日勞不息中夜鬱以思三旬攝吏篆六月逢王
師議禮甫罷訟談兵復弄棊折衝讓才彥飛輓敢
復辭所嗟錢穀理口舌難空施况引諸州糴遙供
萬竈炊較量悉升斗負荷窮耄倪火輪正驕亢羽
檄仍紛馳經營一失理緩急將何裨號令苟不信
焉能措鞭箠但知憂國急未暇軫農時反心良戚

戚欲語復期期安得凱歌速燕喜續周詩

靈巖

杜瓊

廣右百粵地勝概惟西融千峯連萬嶺一一摩蒼
穹間有真仙巖境界如崆峒周圍五六里其中嵌
而空中高二十丈天造由洪濛仰視儼雲漢石色
羅青紅源溜從中來激響何玲瓏清甘更冷冽一
飲蘇疲瘵巖前列奇觀特立仙人峯高高凡幾仞
冠服如真容相傳有所自化身鯉猶龍亘古不改

色直與天地終所以張孝祥品第名益崇後來磨
崖石刻字勞鑄工邑令有賢佐裔出漁溪翁撫綏
多惠政政暇尋幽踪覽此發驚嘆採入圖經中鉅
梓布遐邇寄我來江東惜哉萬里遙此境誠難通
作詩刻巖下我欲凌飛鴻

過馮當世祠詩

并序

潘 恩

宋三元馮當世先生產於宜之龍水天門拜相山
祖墓在馬幼流寓入藤有讀書故址後賁藉武昌

發解慶歷間與羣士計偕禮部賦無逸為元龜廷
試賦蓋軫象天地皆第一歷知樞密院載我明一
統志中好事者高其名行轉相傳致私以為邦邑
重遂素其世焉或曰藤人或曰江夏人或曰鄂人
廣西通志因藤志誤書曰藤人矣慶遠楊子梁之
辨特詳余行部感而賦詩俾刻諸祠壁以識

三元瑚璉士穎異況無倫探竒抱荆璞聲律薄蒼
旻鍾靈自龍水混迹入鐔津弱冠遊武昌奏賦歷

承明掄文邁時彥
躡步振楓宸
數齡秉樞要
樹立亦璘璘
長才奄物化
榮名代所珍
誰謂千年下
閤里亂其真
世儒一夕死
詰旦委蒿塵
緬懷曠今昔
寤寐揖風神
公亦何嘗居
東西南北人

陽朔試諸生賦五仄五平詩

袁 袁

振鐸試粵壤
升堂趨文儒
角藝自古昔
揚言由唐虞
赫赫列聖典
循循先師謨
孰謂此遠僻
皇風同疆隅
朔邑壯以麗
山川雄京都
豈乏雋異士
思齊

游商徒絕谷產豫梓幽渠生蠙珠細物固若此何
云吾人殊衷也甕牖子樗櫟慚疎迂一贊昧孔訓
多歧悲楊朱永嘆道喪久誰當開迷途所貴造士
者同心希蘇湖

遊勾漏洞

程文德

昔聞勾漏洞令求之不可得我今謫居來緣何過斯
國攢峯儼樓臺還衛森戈戟或如象馬驂或似神
人立紛紜盡物形纖巧狀難悉披榛至洞門日午

雲猶墨登臨邈漢宋隱見多遺跡更履探虛呀列
炬穿深黑仰視怵鬼神左右爭嗟咋暗堂目通牖
滴乳盡成石幡幢何繽紛鐘鼓堪轟擊恍惚非人
世梯緣甘跼蹐前驅忽阻水尋源未許入踟躕還
舊路洞口忽見日稚川竟何處烟霞自狼藉庶以
慰竒觀所志非黃白

七星井

上有心泉
二大字

鄭元樂

一鑿始涓涓再鑿功乃完工人汲獻我入口沉疴

瘥可以奉天子可以分百官鬱民渴易飲且為解
拳拳泠泠得我心孰測其淵源我心無所寄聊以
寄茲泉

烏蠻灘

田汝成

百粵信多險茲山復魁岸飛嶠杳峻嶒懸流激湍
泔嘈嘈驚沫紆齒齒元磯礫征帆卷不舒鼓柁理
猶斷臨深絕手援習坎發顛汗已傷千里心焉假
百年觀汜濟暢餘歡回眸永前歎居易如有常僥

偉非所翫潛然臨長川誰能寫幽瘡

永福感懷

錢薇

羣山環周遭一水自滄泓坤輿迥盤薄秀拔由天
成東障桂林郡南屏邕管城材官相森羅汗馬嘶
秋雲禦剽逞刀斧城頭殷旆旌日暮風塵暗衝林
聞血腥怪茲山水區而乏絃誦聲興起在教化撫
循亮由人干戈豈難變南國本文明願言解刀劍
毋負此鍾靈

登粵山謁諸葛廟

陳 暹

諸葛龍卧時聞達非所志三顧勞賢主出門答高
誼恢復雖未竟忠誠貫天地千載出師表何人不
垂涕王公斯文宗今古若神契開山擬南陽廟建
風化係伊余謁遺像維時適清霽躡崖縱遐眺長
風吹衣袂衡嶽青冥中洞庭一何細落日散餘霞
長空一鳥逝回輿下山阪惆悵白雲際

柳山書院

徐 鏞

宏教靈秀區泉石帶城郭雲影與天光鳶飛共魚躍
道體嘆無息陽春愧有脚公餘適登覽晴霧飛
華箔肅容銀臺仙醇鮮自繹絡西垂有豺狼洵洵
猶憶昨指揮賴時英兌醜今盡縛時和民物熙茲
遊亦後樂

韓中丞征蠻

董傳集

嶺表古夷隩秦漢拓山河中代更叛服攻收兩伏
波宋弱屢揺扇狄青勝算多我朝大一統內款開

將柯蠻醜近弗靖戎壘鬱蹉跎嵐岡吼兕象瀧窟
鳴黿鼉皇命整厥部卷甲提天戈賊據大藤峽全
師搗其窠先入奪人氣迅速凌浮艤錯谷竄佚豕
叢篁上下坡飭罰士用命一鼓奮追呼疾驅出荔
浦斷藤衝盤渦陣似蟠蛇去鋒如破竹過烈火燎
柔毛撲滅無幾何惟戰威勝愛惟師克在和掠氓
無妄殺殘孽堪撫摩蠢茲蜂蟻屯椎跣同么麼匪
邀萬里伐赤子傷薦瘥乘銳振皇靈宣慈起宿痾

坐鎮帖不譁戡亂藉廟謨且上平蠻略無徒奏凱
歌安邊在擇吏秉公罔偏頗近習私不逞服寀誠
漁苛推恩衆可結申法令無佗將士氣自倍虎豹
在山阿諸蠻懾且懷功偉守嵯峨剿撫倘無術調
集誰能那願終覃文德永清秩南訛

遊風洞

蘇濬

高臺受和風層雲錯如綺身在城闔中心在雲林
裏北顧燦晨星南望長江吐山花紛欲然村童歌

於止衆鳥飛相呼清聲入人耳歸徑渾欲迷塗窮
意未已

斥金歌

并序

王 泳

頃聞士民喜談石梁郡伯邵金者蒙則曰謂邵非
也作斥金詩以見志


赫赫玉麟符節制綏四疆諸夷外作藩縻之以犬
羊嶺西數千里經畫歸職方一民一尺地莫敢越
侵傷郡守古諸侯威德何可當奈何自納侮潰此

中外防蛇豕俟隙動法行不及強狡豸豈無懼所
恃金滿筐堂堂足以臨所失寵賂章割我赤子肉
還以噉我腸來獻千里金未損彼毫芒嗟嗟邊鄙
民不如中州龐戶口籍郡國身家委豺狼草木亦
涕淚山溪皆疣瘡仁者心惻惻無力拯甦鄉司牧
秦越民無乃大不祥漢德昭版圖王道嚴紀綱葛
伯殺童子征師饗壺漿朝廷甚神武忍此民命戕
竊聞父老言何事須張皇得良二千石飛纓繫其

羌天心甚仁愛撫我漢循良循良者誰歟岳牧莅
黃堂金章明日月玉節凜冰霜關西四畏知尼父
一見剛褰帷布政令五馬五龍驤貪泉不敢流越
石見晶光諸酋蠢不悟如故包金甞自謂最珍重
不屑此牝糠塵翳浼砭砭不得及珪璋泥滓溷行
潦清河自汪洋至人所為寶不在白與黃一笑揮
斥之狐媚奪魄藏歸而戒生事自今慎無將小范
初籌邊西戎心膽惶昌黎著直節鱷魚潛遁忙邊

民今有天漸次復耕桑藩籬拱堂與鱗介奉冠裳
廼知廉生威不怒以斧斨野人為此詩刻石山之

陽



廣西通志卷一百二十

欽定四庫全書

史部

廣西通志卷一百二十一

詳校官給事中臣鄧文泮

檢討臣德生覆勘

總校官進士臣朱 鈐

校對官中書臣 葉 蘭

謄錄監生臣田琦紳

欽定四庫全書

廣西通志卷一百二十一

藝文

歷朝

七言古詩

陳臨歌

後漢陳臨字子無為蒼梧太守民有遺腹子報父仇捕得繫獄臨傷其無子令其妻

入獄遂產得

男郡人歌之

蒼梧府君惠及死能令死人不絕嗣

蒼梧陳君思廣大令死罪囚有後代德參古賢天

報施

入桂渚次沙牛石穴

唐
劉長卿

扁舟傍歸路日暮瀟湘深湘水清見底楚雲淡無
心片帆落桂渚獨夜依楓林楓林月出猿聲苦桂
渚天寒桂花吐此中無處不堪愁江客相看淚如
雨

寄韋珩

柳宗元

初拜柳州出東郊道旁相送皆賢豪迴眸炫晃別
羣玉獨赴異域穿蓬蒿炎烟六月咽口鼻胸鳴肩
舉不可逃桂州西南又千里灘水關石麻蘭高陰
森野葛交蔽日懸蛇結虺如葡萄到官數宿賊滿
野縛壯殺老啼且號饑行夜坐設方畧籠銅枹鼓
手所操竒瘡釘骨狀如箭鬼手脫命爭纖毫今年
噬毒得霍疾支心攪腹戟與刀邇來氣少筋骨露
蒼白御汨盈顛毛君今矻矻又竄逐詞賦已復窮

詩騷神兵廟略頻破寇四溟不日清風濤聖恩儻
忽念行葦十年踐蹈久已勞幸因解網入鳥獸畢
命江海終遊遨願言未果身益老起望東北心惛
惛

吾謫海南子由雷州被命即行了不相知至梧迺
聞尚在藤也旦夕當追及作此詩示之

宋
蘇軾

九疑聯綿屬衡湘蒼梧獨在天一方孤城吹角烟

樹裏落日未落江蒼茫幽人拊枕坐歎息我行忽
至舜所藏江邊父老能說子白鬚紅頰如君長莫
嫌瓊雷隔雲海聖恩尚許遙相望平生學道真實
意豈與窮達俱存亡天其以我為箕子要使此意
留要荒他年誰作輿地志海南萬古真吾鄉

和范信中寓居崇寧遇雨

黃庭堅

范侯來尋八桂路走避俗人如脫兔衣囊夜雨寄
禪家行潦升階漂兩屨遣悶悶不離眼前避愁愁

已知人處慶公憂民苗未立旻公憂水水推去兩
禪有意開壽域歲晚築室當百堵他時無屋可藏
身且作五里公超霧

留別張雲立之

立之昭
士也

鄒浩

來仙夢破知何處君今歸去仙宮路江頭舟楫嶺
頭雲曾許乘風邀月住倏然三載與君同信我此
心如白鷺白鷺忘情亦有情君更情多無量數天
繪亭前不忍分遠送我來欣進步霜凋萬木見孤

松顏色青青獨如故湘南湘北舊光陰從此回頭
但烟霧

江月樓

秦觀

仙翁看月三百秋江波日去月不流肯因炎塵暝
空濶真與江月同清幽蒼梧雲氣眉山雨玉簫三
弄無今古九天雨露蟄蛟龍琅玕長凭清虛府

全州捲烟閣

王鞏

長江縈村若練帶晴岫插天如畫屏山青水秀兩

奇絕道人對此閒禪局紅塵一點飛不到舉手高
可摩天星

桂林二十四巖洞謠二首

趙夔

秦皇開郡為桂林古號名邦五嶺陰山琢玉簪攢
萬疊江分羅帶繞千尋青青四顧列羣山生自天
工巧若鐫玲瓏拔地聳層秀崢嶸嵯峨星斗間其
中有巖十二所伏波靈顯存祠宇顏公讀書窟室
中疊綵北山如列布何年龍隱冲霄去鱗鬣形模

鏡石路仙人劉公飛升時巖壁宛然遺舊題穿雲
仙迹次左右清虛道氣多南谿白雉聽經生人類
蕭寺豐碑有元記信知一性無不通石竇陰陰苔
蘚蒙西南中隱尤勝絕穿處得名因呂公曾公程
公皆舊迹三公皆桂帥也遺愛在民傳古昔沉沉巖谷有
餘光炎方勝槩神難藏周廻不遠郭郭下輪蹄追
賞何忙忙

宜人之地少陵詩閱翫前賢詞意奇爛然五詠非

虛語位歷坤方占一維青青四顧列羣山生自天
工巧若鑄玲瓏拔地聳層秀崢嶸嵯峨星斗間其
中有洞十二所七星山下棲霞府日月華君顯迹
靈遇者當時鄭冠卿歸到人間已三載仙洞光陰
時未改至今舊記傳無窮元巖蟠蟄聞白龍一泓
澄碧寒潭瑩水月圓明下翠峯枕城樓觀環俯視
綠鑠喬林春日媚秦碑柳記已難觀灘水南流泛
渺漫慶林巽穴元風出華景高明隱丹室西方虛

秀貫山腰南華朝陽風景饒夕陽北牖通仙徑白
崔嘉蓮池渌淨許多佳致卒難題留與詞人賡雅
詠

蒙亭

李彥弼

桂江繚繞通湖湘佳山四插江之旁嵐光滴翠漾
波光岸頭秀水皆青蒼誰人築室枕西塘新荷敲
風柄柄香君嘗招我來携觴登臨樂意生清涼條
思伏波離空牀且及尊前飲興長紛劇雄辯聲琅

琅客傳俗事江亭芒蠻歌蠻曲笑遐方應無夢怪
楚襄王但驚歲月去茫茫報國宜多擘畫良功名
未白何時忘此心疇敢憶家鄉

謁陶唐帝廟詞

張 栻

宋淳熙四年靜江守臣張栻既新陶唐帝祠以二
月甲子率官屬祇謁再拜稽首退而歌曰

溪交流兮谷幽山作屏兮層丘木偃蹇兮枝相樛
皇胡為兮於此留藹冠佩兮充庭潔芳馨兮載陳

純衣兮在御東風吹兮物為春皇之仁兮其天四
時敘兮何言出門兮四顧渺宇宙兮茫然

虞帝廟迎送神樂歌詞

有序

朱 熹

桂林郡虞帝廟迎送神樂歌者新安朱熹之所作
也熹既為太守張侯栻紀其新宮之績又作此歌
以遺桂人使聲於廟庭侑牲璧焉其詞曰

皇胡為兮山之幽翳長薄兮俯清流渺冀州兮何
有眷茲土兮淹留皇之仁兮如在予我民兮不窮

以愛沛皇澤兮橫流暢威靈兮無外潔尊兮肥俎
九歌兮韶舞嗟莫報兮皇之祐皇欲下兮儼相羊

烈風雷兮暮雨

右迎神

虞之陽兮灘之澣皇降集兮巫屢舞桂酒湛兮瑤
觴皇之歸兮何許龍駕兮天門羽旄兮綰紛俯故
宮兮一嘅越宇宙兮無鄰無鄰兮奈何七政協兮

羣生嘉信元功兮不宰猶彷彿兮山河

右送神

跋余子壽所藏山谷書范孟博傳樓 鑰

山谷晚在宜州或求作字許書范孟博傳或謂南方無書山谷曰平時好讀此傳遂默誦而書之舊聞此說余子壽來入幕博記善屬文偶談及此出摹本及尊公跋語始知其先世舊物為賦長句

宜人初謂宜于人襄肚老人竟不振承天院記顧何罪一斥致死海南濱賢哉別駕眷遷客不恤罪罟深相親攘攘不容處城闔夜遣二子從夫君一日攜紙句竒畫引筆行墨生烟雲南方無書可尋

閑默寫此傳終全文補亡三篋比安世偶熟此卷
非張巡巖巖汝南范孟博清裁千載無比倫坡翁
侍母曾啟問百謫九死氣自伸別駕去官公亦已
身雖既衰筆有神我聞此書久欲見摹本尚爾况
其真輟公清俸登堅珉可立懦夫羞佞臣

送葉任道教授之官靜江

葉適

太學奏文夸第一國子先生裏行立嶺南梅花太
枯澁花豈喚人人底急爐亭雪深叫孤鴻傳書為

惲明光宮雲翻雨覆古來有不如堂堂金石守

綠珠渡

徐 璽

早出綠蘿村晚過綠珠渡日落白州城草荒梁女
墓江水流古今滔滔不相顧今人不見古時人依
舊青山路如故

遊潯州南山

江邦佐

南山特地森竒峯嶙峋怪石蟠虬龍巨靈夜半擘
山腹幻出巖竇相玲瓏陰陽石罅滴瓊液拂拂洞

戶生天風宸章炳煥神物護斷碑零落蒼苔封稚
川飛昇歲月久丹竈灰冷留遺踪曉猿夜鶴自驚
怨朝嵐夕靄常溟濛我來依守困朱墨欲尋勝槩
嗟無從公餘乘興一登覽萬象獻狀來無窮金莖
濯露素秋節清涼不與世人同憑虛孤嘯岸巾幘
收拾爽氣歸胸中俗駕自憐難久駐還作冷然御
風去太息真仙杳不逢碧雲暮合空凝佇

鐸嘴

劉克莊

州傳靈渠自秦始南引離江會湘水楚山憂赭石
畏鞭鑿崖通塹三百里篙師安知有史祿割牲沉
幣祀瀆鬼我茲閣舟懷若人要是天下奇男子只
今渠廢多人修嗟乎秦吏豈易訾

礮巖

林 邑

常聞仙人渡海術授以尺杖如飛龍憑虛閉目不
敢瞬波濤洶湧喧天風茲巖山窟飛海岸直掃一澗
聲何雄瞑行千步水入耳明探萬壑雲生胸嶽崖滴

乳芝玉脆剜穴噴水蓮腮紅神仙縹緲在何許心
平意定天為通此行況復匪遊戲出門借問春耕農
蔣孝子坊歌

朱子恭

割兒肉救兒親一念之烈不顧身身且不顧名何
足珍哀哀孝子數點血經歷千古常如新

全州南城

馮 屹

全州城南何壯觀石崖為趾江為壕凌落渡江騎
馬去空濛瘴霧漫綈袍邈迤過灘水小艇浮桐槽

半渡急雨雪舟師失飛篙雨餘山路水如注石齒
犖确生戈刀馬蹄轉側不得過有力如虎空皮毛
地窮路盡處橫絕青山高褰衣扶杖躡天險十步
九顧愁猿猱長沙頓伏幾百折背脊菌蠢盤鯨鰲
馬瘦人力倦野闊風怒號薄暮投宿驅濕厲析薪
爨鼎燒村醪一杯酸澁不可嚙平原督郵羞兒曹
我行湖湘歷八郡政欲閱實寧辭勞才疎病懶事
多廢南山何日接蓬蒿清風明月共三友山猿野

鶴來二豪一江春水澄葡萄蘆花萬頃眠魚舫

梧州江上夜行

葛長庚

雲去雲來幾點星城頭畫鼓轉三更草深螢聚渾
成燐月暗鶴飛惟有聲何處夜航鳴櫓過滄江如
鏡烟半破忽然長嘯驚沙鷗飛入前山不留個

過邕州崑崙關

元陳孚

昨日過大林關酸烟毒霧山復山今日過崑崙關
寒泉怒瀉聲潺潺道傍榕葉密如織十柯萬葉巖

崖間怪藤倒懸一百尺雪霜不剥皮堅頑勢如蛟
螭夭矯下絕壑駐馬側視不敢攀老虺忽何來眼
閃電光尾灣灣山童驚顫髮卓豎勸我急勒金鞍
還因思秋天使貌貅夜度摧狂蠻上元燈火杳何
處至今野燒痕爛斑我雖一書生袖有青絲綸誓
將報天子肯避路險艱邕州南征士三萬鐵甲未
解寒痼瘵我身七尺不能勇金符正爾羞蒼顏鐵
鞭一揮出關去孔雀飛下滄江灣

邕州

左江南下一千里中有交州墮鳶水右江西統特磨
來鰐魚夜吼聲如雷兩江合流抱邕管莫冬氣候三
春暖家家榕樹青不凋桃李亂開野花滿蝮蛇挂屋
晚風急熱霧如湯濺衣濕萬人塚上蜚子眠三公亭
下鮫人泣驛吏煎茶茱萸濃檳榔口吐猩血紅飈然
毛竅汗如雨病骨似覺收奇功平生所持一忠壯荒
嶠何殊玉堦上明年歸泛兩江船會酌清波洗炎瘴

度摩雲嶺至思凌州

嵯峨摩雲嶺石壁如梯繞天頂千年毒瘴鬱不消
怒入老楓結丹癭蒼莽思凌州懸崖結屋如蜃樓
寨門半掩刀槩健隱隱雲際聞鳴牛奴獠下山健
如虎口紅如血面如土手捧椰漿跪馬前山虺水
蟲間殺俎對此停鞭空自慨吾獨何為在荒裔他
年周京王會圖願借丹青寫椎髻

廣西謠

傅若金

廣西謠一何悲水泠泠山淒淒寧逢猺賊過莫逢
官軍來猺賊尚可死官軍掠我妻與子

八十里山行

桂林之區猺賊雜處南有八十里之高山絕天綿延開
險阻賊人倚之作巢砦刦掠經年勢還大官軍收捕費
供給主將逡巡竟何待居民近山晝夜愁四下行人皆
白頭况聞良家半為賊官府貪橫仍誅求安得大聚
邊頭兵甲鑄田器盡鋤山高作平地高山平猺賊斃

狄武襄吟

楊維正

賓州海月光團團
劍花火樹燒爛斑
將軍如內容未
散捷書已奪崑崙關
當時諫官疑武士
豈知辨賊遽
如此於戲銅面將軍
今豈無世無丞相
龐公甘老死

伏波山歌

張湖山

桂林有山名伏波
蒼崖翠壁高嵯峨
山根陰洞透水府
神奸物怪交撓訶
我來登山復尋洞
直涉風浪攀藤蘿
無誰可問得名始
賴有殘碣堪摩挲
為言新息昔事漢

老矣矍鑠猶操戈提師振旅蹴蠻國下潦上霧寧憂那
仍聞薏苡能禦瘴採之返載數駱駝一朝明珠肆讒口倒
囊投棄茲山阿有云昔人捕魚者龍宮竊入張網羅適
遭老髯耽晝寢攫取明珠懷青囊自知至寶世希有
惟守可遺那歸他守稱賢侯不敢受亟命返璧毋蹉跎
洞名還珠此二說無乃好事相傳訛柳州使君老好古扁
舟況此曾經過重來邂逅請停楫君看此事當如何使
君無言若有得仰面長歎春風和肯將往事擾胸臆為

我呼酒傾金荷明朝酒醒湘水上引帆南去飛如梭

堯山冬雪

劉志行

洪濛一判天地曉萬古茲山青未了朔南聲教本
一源大地圖輿古無考玄冥此來事遊戲剪水作
花南到地臘前不識豐年瑞翻令粵犬雲間吠

舜洞秋風

當年大駕巡南中薰兮時兮歌南風太音九奏鳳
凰集真與塵世開盲聾重華遠矣成飛仙湘靈灑

淚秋風前天荒地老不可詰秋風滿樹淒寒蟬

題重修靈渠卷

明
吳勤

漢潭之流抵靈川秦人鑿渠通水利累石為堤列
陡門中江一水分為二北曰湘流達洞庭南下蒼
梧歸海溼秦漢而後至於今千百餘年幾興廢我
朝洪武丙子冬繡衣御史遠乘驄奉命重修董斯
役規畫晨夜勤丹衷萬夫雲會爭趨事咄嗟指掌
收成功甃就陡門三十六長堤屹立如崇墉青山

環繞湘江曲龍母祠前春水綠舟航來往是通津
灌溉良田萬頃足白雲攀桂架輿梁千秋峽路無
傾覆朝廷興利實為民嚴公執法惟忠勤豈但寬
仁稱使者疏通練達真良臣歸來奏節承殊渥晉
秩尚書縻好爵搢紳滿卷贈雄文予筆高歌寫新
作

留題湘山寺

楊基

瀟湘縣前山繞城綠陰滿地聞流鶯入門下馬松

徑濕攬欄花開春雨晴山僧知我携客至身披袈
裘下榻迎汲泉敲火煮新茗茶香鼎潔泉甘清龕
燈照佛佛像古舍利五色真身明黃金布地孔翠
帳幡蓋聯絡皆珠瓊飛來巨石卧青兕以爪扣擊
成金聲十年足跡走萬里福地徃徃迷榛荆茲山
信是無量壽百千萬劫完不傾乃知願力自廣大
天神守護邪魔驚我來作禮繞三匝寶花如雪天
樂鳴便從真如入妙覺豈有世網能相撓同行僚

友二三輩勸我寫石留芳名他年老眼得再覩風
雨剝落莓苔生

過蒼梧峽

解縉

廣西下來灘復灘三百六十長短灣潭心綠水緩
悠悠長灣短灣凝不流涓涓千尺淨見底隔岸空
行魚曳尾忽然路絕山勢回峽石水聲如怒雷石
齒鑿鑿森鯨牙龍騰虎躍鸞回車我行已過正月
半一夜水生浮漢槎龍潛虎伏杳不見但見滿江

圓浪花浪花飛雪掩萬瓦船下高灘疾如馬浪船
起向空中擊舉舵齊橈不容力舟師持篙眼如虎
拈住石頭輕一擲直下水痕奔箭急老稚憂懷行
感泣齒聲剝剝叩神靈拋紙燒香齊起立為言水
淺僅容舫下灘失手爭纖毫水聲怒起兩岸迫撇
旋指顧下洪濤龍君水伯似相曉此水不大亦不
小燒楮漚酒謝神功好似春遊在靈沼翻思初下
象鼻山怕問行人多苦煩驚心樂水昭平驛慮患

防厄不暫聞忽見蒼梧山下日耳聞鶯語自間關
豈知平地風波惡何處安流不險艱此心常似初
來日三峽滄溟任往還

風俗謠

王清

平南雖瘴地風俗猶可觀十家烟火合百里封疆
寬男務耕耘女務織絃歌里巷多儒冠我時承恩
鎮南粵分符兩度來征伐旗影朝飛蛇嶺雲鼓聲
夜落烏江月烏江月落刁斗鳴拔劍起舞秋風生

安得貔貅千萬士一掃蠻崗烟塵清倒挽天河洗
兵甲長使斯民歌太平

平斷藤峽

有引

韓雍

成化元年冬予與太監盧公陳公凌公總戎趙公
少司徒薛公同奉命統兵征兩廣兵戎所加勢如
破竹不旬日而斷藤峽已平賊黨盡誅武功告成
題以示後

人言斷藤峽險峻天下少我視斷藤峽培塿一拳

小蜂屯蟻聚百萬家跣足蓬頭盡猿獠數十年來
肆猖獗二廣生民苦騷擾五征不克勢益張處處
孤城未能保聖皇當天赫然怒選將提兵奉天討
內外羣公總豪傑百萬精兵雄矯矯共言固守非
良圖必欲長驅且深搗雷霆砰訇鬼神怒幾日羣
山盡傾倒百練鋼刀破新竹萬里長風振枯槁巖
居穴處皆蕩焚瘴霧烟塵都迅掃積屍如山血如
川誅鋤只許留襁褓兔竄狐奔網羅密我軍追戮

如芟草大藤根株悉已斷五嶺封疆真再造振旅
班師歸柳營黃童白叟迎遮道自言固望來蘇久
不圖便見成功早從今水陸是通衢來去行人免
迂繞有田可耕山可樵共享承平永安好聖皇睿
算天助順羣公整頓南荒了豐功偉績萬古傳附
驥成名愧臺老

成化七年冬戶部主事李君士美奉璽書清財賦
凡兩廣二十郡地冒暑雨衝瘴毒無程遍歷人不

敢干以私而搜剔奸蠹無能隱蔽亦未嘗執已見
及非辜誠才德無優君子也于其歸賦詩送之

嶺海窮冬變風色瘴烟滅盡梅花白行臺日長羽
書簡載酒遠送朝天客客乃人曹粉署郎早登科
甲隨班行作官今已八九載共誇節操非尋常昨
捧天書下南越兩度歲華猶未歇馬蹄踏遍瘴鄉
雲所至無人敢私謁千倉萬箱總較量寸絲尺縷
無遺忘兩藩財賦清似水英聲先已蜚巖廊聖明

金剛經卷第二十一
因此知才器特進一官員外置遠大從今未可量
好與皇家圖濟利國朝財賦取最寬可堪水溢兼
旱乾東南已嗟民力竭西北更苦供輸難司徒年
來亦難處左區右畫勞心緒君還有策莫憚言報
國須當以身許

傳節婦吟

黎暹

柳折懷水風花落懷山雨潘家之妻傳家女年少
良人死羈旅旅魂依依旅骨歸抱骨長號骨無語

骨無語蕭蕭後園樹園樹枝頭不得死歸來死向
深閨裏許君心還君身生同枕死同墳夫亡見烈
婦國破識忠臣如何宋代賈餘慶視棄君王如
路人

崑崙關樂府

李東陽

崑崙關頭戰骨枯龍衣染血紅模糊軍中宣言老
儂死不是彼儂焉有此將軍貴實不尚功世上焉
有將軍忠君不見漢王一赦軍中守武將紛紛皆

藉口

麥黃歌

包裕

大麥黃小麥黃家家男女登麥場
老者看家壯者出旋挑野菜煮羹湯
男鋤女刈不辭勞麥場堆積如陵高
烹雞打餅薦先祖沽酒擎尊娛父母
舞者舞兮歌者歌胥言收穫今頗多
忽聞官府里胥至征討夫錢征夏稅
須臾算盡無孑遺老稚含悲欲訴誰
共誇今歲麥秋好孰知反得一日飽
好將民

隱達聖朝樽節財用寬征徭古來民足君須足莫
使民有逃亡屋

齋榜謠

桑悅

上司出榜安強猛軍民激變法不饒為頭最禁打
烟竈狼虎身上按脂膏市人得榜心獨快竹筒束
縛青絲帶昂昂意氣似領敕借馬星馳下村寨倚
官託勢情萬千籠雞沽酒相後先水間一棒沒痛
癢戶戶又科齋榜錢夷人文字何曾識鄉老落來

遮屋壁

至柳郡寫懷

憶昔宗元留口語罪人方渡湘灘水我生自少知
貴重垂老投荒六千里自衡抵桂歷險灘寄命蛟
龍吞吐裏又聞到郡路梗塞帶累妻孥愁欲死桂
林借住且安穩捧檄獨行豈得已各堡嚴兵爭護
送滿地干戈人似蟻右江分憲蒙菴公下士傾身
衆莫比接哨將軍金子容舞劍雪花隨地起隨行

健兒經百戰賊衆聞名自披靡慶遠太守先赴任
水中青雀途駮駢牛擺灘頭獲生擒長繩反接牽
回市兒童爭欲啜其肉黃鵠入籠亡爪嘴各營夜
閑不成寐何況雨聲清滴耳明朝行到海灣浦大
帽隨風去如矢子容呼作落帽洲嘆息官軍殲于
此去歲長沙衡州官軍戍此地多被殺深定江邊險煞人淺瀨戔戔
石齒齒崖前朱草官吏血商賈疊屍崑崙底匝山
先鋒特拙手似報箐中諸賊徒林深埋伏難盡搜

首過還防截其尾曉度旌旗筋竹嶺衆賀今朝保
四體郡堂清冷似僧舍邊境深難立網紀離城十
里是生獐通衢處處生荆杞打村刮路聞暗熟里
半居民存有幾衆戎守備日籌畫據險賊巢難盡
洗孔子居夷豈兵革愚生安得窺涯涘每逢村老
善告語天子仁恩浹遐邇昔年擣破斷藤峽十寨
九空皆自取爾傳吏語歸告戒鎔劍為犂事耘耔
舉頭似領心不然習俗為非是生理常聞老子之

流沙玉融何曾枉仙趾
崑中結乳為寫真幢蓋前
頭印其履象臺白雲裊成象
我欲乘之詢太始
當時不降犬羊種
百粵道路平如砥
古屏水冷結幽
亭三月笙歌賞桃李
生人何故陰氣雜中州
亦不純
君子若令四海盡雍和
化外瞻天如尺只
天公果肯答因由
但願銀河下雙鯉

夏日收糧有感

婦女持箕來逐逐
每言某堆雜粃穀
府官聽信令

簸颺粒粒圓齊方上倉青蚨入手手先軟掀弄明
欺府官眼會籌上簿人憧憧糶穀還入原堆中鳴
呼世間此弊那能革安得南海觀音手眼俱千隻

長命草

龍城山中長命草采采黃花顏色好懸崖挂壁常
發生朝暮搬移不枯槁歲寒獨見栢與松非時欲
植難為功爭如此草出凡質淨洗塵土根虛空世
間物變無不有杵地成羊樹生酒

拒賊行

錢溥

古藤逆行四十里白馬浦頭急如矢輓舟方渡十
二礮蠻賊已屯山樹裏兜鑿海戰紛如雲出船仰
望疑我軍高張强弩發毒矢始信賊勢來成羣柴
公樓船盛旗幟賊欲先登豈無計弮然七矢傷四
人衆皆錯愕將焉避賴公揮刃督其進善射復數
陳勇士徘徊且却向中流脫此虎口良不易是時
官軍滿哨船遠視勝負不敢前頭哨聞風已赴水

後哨看賊登山巔賊初凌晨刦村落滿船銅鉛意
殊樂忽遇帆檣蔽岸來竟尋生路將船泊我軍有
一統率者勦絕其後解諸縛忍使媚女并幼男盼
盼青天去從惡計不出此心茫然賊反小視來侵
虐親身目覩尚如此道路傳聞誰復許寄與征夷
大總兵將士勇怯當先取

贈桂林劉孝子本

張駿

誰謂天不明有目能窺孝子情誰謂地不靈有心

能種孝子名吁嗟桂林劉孝子欲使天地俱長生
蚤歲趨庭學詩禮堂上白頭甘滲瀝發跡巍科都
美官龍敕恩頒紫泥璽銜哀歸訃白雲廬麻衣露
肘頭不梳瘦骨如荻面如墨青松自植草自鋤落
日寒烟鎖枯木野狖山猿相嚮哭手持喪禮一編
書口不成章眼能讀可憐植物如有知蓮花並蒂
開荒池縞素亭亭哀朝露欲語不語雙含悲蓮子
不成蓮葉老莓苔滿地無人掃酸風苦雨墓門前

靈根秀出三芝草牧豎樵丁時往來忽見鬱鬱塵
襟開共言孝感有如此歌誦遙聞都憲臺于時藩
臬衆夫子目覩徵祥心溢喜交章入奏動冕旒詔
許華坊耀閭里我生旌表三義門一飯不敢忘君
恩臣子相期兩無愧忠孝由來同一源況是堂堂
大明世禮樂衣冠堯舜治澆漓風俗盡還醇白叟
黃童飽仁義君不見天有目地有心公道瞭然無
古今竹帛聲光照天地海嶽與爾同高深

平南謠

張瑄

平南縣前江急流平南郭裏人烟稠孤垣雖與賊
鄰境民貧固守恒無憂驅我成城者誰子攫取官
錢大半歸盜心覬覦民心離高壘深溝舉難持妻
孥戮辱不足嗟獨憐累及貧民家江水不能流恨
去荒烟白草啼寒鴉貪墨敗類亦自敗將謂成家
反成害嗚呼慢藏永為愚者戒

撫猺歌

區昌

何年政令苛且煩我民棄業投深山弓刀雜居夷
與蠻欲悔無路何由還天子仁明照八垓有如妍
姪臨鏡臺不以刑威奪恩愛故遣縣令勤招來勤
招來意甚長捐爾刀與鎗飾爾巾與裳挈爾妻兒
復爾土鄉爾田爾莊爾稼爾桑我蠲爾差除爾糧
爾不悛兮爾自戕爾尚歸來來莫遲我有賞犒卹
爾私爾尚歸來來莫疑我心誠信天所知携扶老
幼登縣門享紅酒及牛豚爾老有子子有孫同歸

壽域同天恩

招民詞

陳璆

民歸來新皇雨澤遍九垓官府恤民如恤孩去逆
效順毋疑猜

民歸來幾遭標掠空衆財今得撫安無後災生意
還從勤裏回

民歸來室廬或火或傾頽增新葺舊亦易哉剪茅
伐竹皆爾材

金野史卷一百二十一
民歸來二年不種田蕪菜因風一火俱成灰春來
雨足禾易栽

民歸來舊業拋荒真可哀
苧麻根在不須栽
只用
勤勤芟草菜

同海陽舒教諭登湘山絕頂

顧璘

兀坐不快意起登湘山頭
九疑崢嶸忽到眼
洞庭湘浦遙爭流
盤空蒼磴路險絕
四月爽氣疑清秋
波濤微茫指南海
彷彿十二仙人樓
欲行更止魂

惕慄聲動河漢驚牽牛舒君好奇更豪宕攀援絕
壁枝撐幽西瞻蒼梧弔虞舜滿江淚竹湘靈愁尉
佗孤墳竟誰是紛紛白草埋荒丘憶昔樓船下南
粵連天雪甲橫戈矛祇今陵谷已非昔況乃楊僕
諸王侯古今成敗等翻掌天地逆旅俱蜉蝣與君
且醉蒼玉甌對面但喜莫復憂明朝解纜靈川水
却望湘山思舊遊

洮水行

蔣冕

英徒破走長沙國吳臣誑誘亡奔越漢軍追擊至
湘中布兵大敗洮南北史記高皇十二年特書本
紀司馬遷漢將不因來此勝區區洮水名誰傳後
來武帝建吾邑遂以洮陽定疆域由漢相沿直至
隋閱歷年華幾十百洮水東流營水西九疑山與
楚雲齊咫尺春陵路非遠尋源我欲溯瀟溪

古塔灘

魯鐸

古塔灘注山窪飛湍屈曲如奔蛇中流惡石故激

怒跳珠濺雪紛交加鏘鏘爭走萬甲士刺刺倒露
千狼牙官舟一葉百夫輓安危祇與毫釐差我時
攀巖過絕壁四顧莫非猿所家倦來坐石却俯看
握拳吐舌生咨嗟九龍山史好竒甚哦詩但道山
水嘉更嗔來日舍舟去磨崖不及親鐫過

左州元惡就擒州印復還偶成 鄧炳

何物癡兒膽如斗敢取銅符獨懸肘效尤武仲要
魯君僭擬平盧龍襲留後冒姓已步衛青塵禦人更

出黃巾右逋逃相繼遺妻孥耕鋤無數荒苗畝廬
舍滿眼麋鹿場牛羊絕迹靡蕪藪讐深恒作林甫
遷計窮惟事檀公走轅門軍令應加誅邊境夷情
宜善誘寬柔已示再生恩迷督不懲難追咎懸賞
感激勇士心面縛立致壺城口身卧桁楊悔莫追
罪服上刑甘自受兵不血刃俄成功印失中書仍
復舊黥驢逞技將誰欺穴鼠抱金竟奚有窟中狡
兔終難藏釜裏遊魚寧復久寄言奸宄休喧呶逆

登叛藩咸授首

橫州道中見日光誌喜

潘希曾

蒼梧南來一千里扁舟牽輓窮山水蠻烟瘴雨動
浹旬長晝冥冥無午已僕夫泥塗簑作衣青蕉裹
飯不療饑蕭條行李潤生醯寂寞炊竈寒無輝愁
予兀坐蓬窓下忽覩陽光射雲罅千林生色嵐霧
開須臾變幻疑昏夜人言此方風土乖冬雨苦久
晴頗佳乍晴不堪還乍熱鬱蒸癘氣生陰屋我

望青天再下拜太陽高照元無外
最爾遐荒特可憐
覆盆何礙乾坤大

龍巷石

巉石粼粼巨江北凌風欲渡鬚鬣赤
貝宮清淚濕羅衣
複道西風留轍迹
露肥苔蘚磐石幽
天光搖落雲不流
晚涼灑掃石上月
一線長繫江聲秋

合江

黃暉

鳴颺蕭瑟癡雲低鷗鵠聲斷春日西
狂雷徹底吼

到曉百川沸與三江齊中流却羨鰲足穩一任旋
波虎眼轉仙客船如天上坐笑指銀河路不遠

三華山

金翎拍海山鳥鳴寒光拂曙天欲晴溟濛瑞靄灑
霏翠仰視不見華峯青須臾捲幔山林薄傍柳縈
花遶城郭南山玄豹藏已久文彩斑斑變龍摵

弔張將軍

潘 恩

灘江瀟沛山截薛險地豺狼橫生孽將軍怒賊五

嶽傾髮指危冠心激烈魯陽麾日黃雲悲手提蛇
矛佩明珠變生流矢壯士摧殘崖碧染蒼弘血總
戎影節江之湄洛口勛名侈奇絕探毛索羽藪澤
空將軍有兒身不減

殷司馬平廣西寇歌

王世貞

殷公文武邦之屏不學淵源空有名一歲再遷中
執法兼提六管嶺南兵如雲鷺鸛排千艦五色神
羊映百城征南將軍不穿札渡瀘相公單白帟軍

聲雷動細柳營殺氣霜凋大藤峽任是蠻烟開羽
扇還留漢雨洗金甲狼兵錦鞬繡螭弧奪得生猺
換酒沽早知不殺稱神武悔自跳踉作後夫處處
春田催布穀朝朝列肆喚提壺千秋獲嘉縣重觀
伏波不得驕銅柱灘水灘和鏡吹聲鬱林花滿旌
旗路遙望蒼梧雲正蒼是公功成勒銘處

烏蠻灘

張佳蔭

烏蠻灘前石齒齒盤渦轉地驚濤起險絕空傳艷

瀕堆估客帆檣愁欲死萬里江源異域來右出夜
郎左交趾青天赤日雲四垂跼跼飛鳶墮深水我
本西梁遠道人瘴鄉奔逐胡為爾停舟一奠伏波
祠丹荔黃蕉前致詞英雄心事無今古神物風雲
各有時銅柱功名儻難就澤車欸段隨所之

冬雷行

謝少南

季冬六日次辛丑北風吼雲走雷訖簷窻明滅下
掣電屋瓦騰凌激翻斗倉皇籌鼓報四更攬衣起

坐百感生由來天地貴藏用太和保合歲乃成祗
今纔見一陽復龍潛蛟蟄韜元精雷乎胡此出地
奮駭怒宣洩何當平遷人刀騷散華髮三年泥翮
滯西粵徼域兵戈漫有期朝廷禮樂元無闕自秋
天旱不收禾被野即看多戰骨憂時苦歎宮庾空
忍令蒼生受顛越今夕何夕仍聞雷短檠燄促寒
爐灰雞聲唧唧發遠舍東牖復送朝曦來

全州大雨

有引

董傳策

八月十六日過全州將渡興安斗時久不雨斗苦
涸惟修遂議登陸余怯瘦骨艱行且謂旱久當雨
堅艤舟以待是夜果大雨明旦發舟殊捷惟修顧
謂曰我夜禱雨隨應余笑曰君欲洗路塵耶雨乃
為我濟舟耳漫援筆記之

海陽山斷湘灘口何年鑿引成巨斗歷陟千級慎
啟封我欲渡之苦旱久吳郎此際遽擔簦獨怯病
骨猶難守纜結枯槎夜向分風雷忽作龍大吼俄

項靈澤翻天瓢大江小江鮫石走曉來江浪平秋
烟捩舵似飛歡舉酒憶昔韓公開嶽雲精誠豈復
千穹佑雨乎雨乎端為誰應遣蒼生年大有

粵西山水歌

粵西山水甲天下蜀中險絕此其亞瀧濤飛出水
晶宮龍齒潺湲舟底窄仰視流水一竅通衆石尖
尖撐太空烟嵐真罩星斗落目中半是參天峰峯
勢參天江欲瀉懸崖縹緲靈根射削如玉筍秋不

洞突如長鎗鋒倒掛巖洞玲瓏何太奇
訇然中開峙兩儀疑有神斧鑿其穴
牽連祕詭光陸離飛雲孤岫控西楚
靈鷲盤旋鳥猿舞遊覽縱橫不記名
大者人傳可歷數桂林城標風洞山
石壁巉巖大窟園七星巖帶龍淵起
隱山六洞間開顏江邊復有還珠洞
象鼻之山江勢湧從此直下灘江來
兩涯山石彌江縫江灘閃出鯨鯢蹤
歷落灘聲石可春昭平南渡龍門險
蒼梧瘴沒雲山重潯陽水折

藤江浦烏蠻灘遙那可渡諸灘捲出邕管平崑崙
西接柳慶路聞道柳慶路崎嶇峭然天險土荒蕪
奇山拔出洞常裂江道半塞蠻張弧行人操戈出
城郭雖有山川難自樂兩江左右風不殊炎蒸蛇
豕誰運畫憶昔秦漢開邊寨宋家設鎮中險艱
伏波銅柱標南極武襄勲在崑崙關我朝韓公斷
藤峽桓桓中丞興朝畧諸蠻竦息不敢譁後來府
江還著脚思田倡亂姚公徂新建撫定降盧蘇借

兵威平八寨三十年来寇漸多吁嗟粵山徒聳突江
流不轉山露骨狼烟日夜起江波誰云靈氣鍾厥
物我來遠戍作逐臣全生仰沐天王恩殊方豈怪
風土惡却憶高堂玄髮人登臨悵然百感集遊子
長帶風塵色山自高高水自流那堪慰解離人臆
披摺不辨馬牛呼猶向江山強自娛茲遊奇絕恐
難記我作斯歌當畫圖

崑崙歌

送顧侍御
一貫出巡

崑崙山高控西粵飛蟠千丈何奇絕青峰突出破
大荒赤螭夭矯森石骨氣槩橫攢玉碎圓巖泉灣
瀉珠流沫怪樹枯藤掛老崖雲屏疊斷蚺蛇穴山
精嘯風瘴作雨菁篁颯沓嵐烟掣枕榔枝暗珊瑚
拳荔子花斑鷓鴣舌陽和偏落四時花鬱蒸不夢
三冬雪涼燠俄驚變曉昏亭午日高雲乍撥羲景
依微盪綠鬟蠻疆一望迷垵垓瀧練疑摩峭壁牙
竅天欲墮盤江髮星躔翼軫古隘關邕管西迤領

方接明都銅柱鎮華夷汴宋醜儂猶宰割經畧曾
標京觀雄奇兵一夜關南奪至今馬狄並高勲八
寨還嗣新建烈滄嶼不改戎機銷羣狙跳梁誰式
追彌原荒頓轉流移生齒難繁聲教闊使君行
部踏春來春光縹緲薰颺發繡斧擎翻瘴嶺霞花
驄嘶控皇華節霜姿只飽苜宿餐滿道清風洗炎
熱飄蕭萬里載馳驅今古興懷徭吹徹我戎徒慚
白面生君巡自憶丹穹闕相逢且莫誇壯遊好向

明時樹宏業振衣八極被九垓俯視崑崙成一撮
閱鎮峽堡次韓襄毅韻

陳宗夔

前七十年藤峽剿韓公之功真絕少後七十年弩
灘平蔡公之功亦非小灘連峽險反側多倏忽黎
民脩夷獠攻城刦寨寡寧日老稚晨昏不相保憶
從憲廟初登年蠻獠稱兵正雲擾韓公被命震天
下力抵浮言決征討文臣武將一時聚整整堂堂
復強矯層嶙已見應機開雙髻從來乘虛搗須臾

列盜盡俘滅萬姓稽呼角崩倒雷轟決裂破昏晦
雨溢淋漓沃焦槁平開戍壘江流通兇窟鯨波靜
如掃丁男始出挹犁鋤婦子纔嬉懷乳祿自從韓
公奏凱還營壘又見生秋草碧灘灘寇復猖獗據
險負固稱天造籌邊念切司馬憂分兵亟上潯陽
道一朝夷寇復殲決撫散餘徒索弓早戍樓重立
鎮江郭郭外新民漸馴擾若教防禦盡如今百粵
封疆百年好吁嗟乎韓公往矣蔡公歸西土歌思

思未了巡行愧乏靖邊猷
仲紙裁詩慚二老

自木龍渡浮江而下過還珠
感伏波之事作還珠

歌

張鳴鳳

渡頭水深百餘尺洞門落照涵波碧
人言下有支機石定是織綃之淵
客往往珠光射旁磧誤道曾傾浮海
舶梁松小兒口多蜚朱勃書生訟徒
劇將軍心事隨已白帝舅列侯何赫
赫悲哉巧舌銛如戟况復孤臣屢經
謫呼兒把酒酌烟波歌以還珠

感今昔

棲霞篇

并序

俞安期

棲霞篇為棲霞洞作洞在七星山半七峯參錯離
列洞亦迂曲盤旋蓋穿亘七星而行其腹中約七
八里遼遠與冥瑋怪萬象啟堂皇支樞柱中有佛
老二像羽則鴻鵠介則龜龍毛屬則鱗鱗屬則鯉
屏帳旂幢璆石鼓鐘花卉珍異咸是膏乳所成為
桂諸巖洞之冠張羽王志桂勝嘗首譽之以乏班

張左陸盛藻發其靈祕僅有宋季諸作為憾余以
退之汝城二王孫導遊撫其實際加飾鄙辭組為
斯篇殆得十二雖不類漢晉諸公宏製頗拾唐初
四子之遺羽王其稍能釋憾否耶

桂海紀殊域桂林啟神垌山水竭嘉譖巖竇侈圖
經中有羣峯列斗象上摹七曜成山形神斤鬼斧
構靈窟綠塗碧綴開仙庭靈窟仙庭非一所陰深
獨有棲霞府到如天表叩明堂入似星躔穿廣宇

麒麟吞吐黃金鋪龍鵠盤迴蒼玉柱毬場舞榭各
經途旋室傾宮頻改戶改戶經途透紫烟平原曠
藪何延綿朱泥鑪冶鍊藥地硃砂阡術分區田紫
蓋挺芝芝九榦絳雪成丹丹九還瓊實青柯積乳
液瑤萸碧葉滋膏泉乳液膏泉結竒瑰變態繽紛
難具擬誰謂雕屏百堵非競言黼帳千重是迴頭毛
寶左顧龜振鬣琴高上翔鯉東渡神僧趺寶蓮
西行道士歸仙李別有瑇琳列簾縣帝庭樂器羅

鈞天華幢九華導飈駕米旂七米迎雲輶孤上金
莖承露起並垂玉筍排空連南遊萬里耽奇客東
燎窺臨每驚魄仙偶難逢日月華王孫到共烟霞
癖顧影疑過絳氣居題名恍隸瑤臺藉詎信青山
寂寞區翻藏元圃繁華宅

海陽三異謠

丁令君民予育老幼熙熙覆華屋淳風舒徐扇邦
域致有嘉祥感羽族嗟哉白雉何太馴引雛飲啄

遊西牧

丁令君理冤牘洞開圜扉放疑獄怨氣紛紜散邦
國致有嘉祥感鱗族吐哉盆鯉亦有神化作飛龍
脫魚腹

丁令君去害馬孰敢依馮城社下暴夫驅走出提
封猛獸驚啼散郊野吐哉猛虎遲渡河揚子寺前
遭鬼打

蒼梧行送沈道微參知

九疑南去蒼梧邱重華巡後歸中州牛女北來
野垂盡鬱黔南瀉江分流地連五嶺多巖竇雨暘
寒煥稱殊候九月惟看月似霜一冬不斷花如繡
由來風氣稍雜夷跣行鼻飲還躑踈女兒晝挂金
錢舞蠻童夜捧蘆笙吹更有獠人便騎射輕生每
獵孤城下賦稅寧來大國供衣裳未習明王化分藩
此去今屬君虎牙高建蒼梧雲車書試使通化外
萬里安事銅船軍

上林歌

關與張

上林邑勝如何上有大明萬仞之高山下有澄江
一帶之清波遊人不敢陟飛鳥不得過古木參天
不知數但見白雲終日護蒼蘿思鄰八角環其後
古淥鏤鄣列其前縣治屹然當中央層巒怪壁鬱
嵯峨衡陽有臥龍十年在隆中一朝祥雲集扶搖
直上太清宮上帝命爾龍乘雲下九重簸擊滄溟
十萬里復輓三湘洞庭之湖水南踰五嶺入蒼梧

遙望上林而至止上林久旱望甘霖甘霖不至民
何心雲一起兮枯槁生雲再起兮龍再陰雲三起
兮四郊足雲四起兮膏澤深轟雷聚石魍魎奔洪
崖下瀧瀉飛湍和風鼓處庭花茂甘雨來時徑草
春春色偏饒上林苑野老行過粵水濱雨師風伯
安其位勾芒上天告上帝上帝謂龍功不細余將
命爾遊天庭坐令四海沾天惠

全州道傍官松歌

何喬遠

全州官路何逶迤十里五里松參差間桐攢梓相
撐薄穿雲參天互蔽虧冰霜一道過驕陽笙簧兩
徑吹流颺鱗甲老為赤鐵色蒿蘿挂作青蚨枝共
言官樹不敢伐或有剝蝕無枯皮昔余京師宦六年
心愛此樹常攀蹇報國寺前葆蓋團顯靈宮裏
虬龍顛天壽山中最蓼爽原廟閤密無繇前誰知
此樹看不絕行人客子心俱便借問此松何年有
國初種者章太守古人為政重精詳津梁塗巷皆

紀綱蔽芾遺思今則亡斤斧且得非時傷嗚呼斤
斧非時傷我行大江以南不見梗楠與豫章

勾漏歌

蘇濬

息馬山之曲春草萋以綠白雲何意出層巔千峰
萬峯自相屬數聲雞犬空中聞百丈蛟螭巖際宿
山前老叟向余歌嘲風弄月誰羈束欲訪山翁何
處尋笑指松間一茅屋昔年菖令安在哉片片
烟霞出空谷幽枝堪掛竹皮冠清溪不礙荷芰服

珠璣芝田儼相向鳳管龍笙斷復續莫問丹砂事有
無一醉山中萬事足

謁柳柳州祠墓

王士性

天寶貞元人已死千年大業竟誰是手提大冶鑄
乾坤後來共說河東氏並轡中原有幾人愈也角
立河之濱百川却障狂瀾折風雨延津會有神解
道河清苦難俟瞥驚白日風塵起去國投荒十二
年驅鱷開雲八千里魑魍蛟螭作比鄰強開閭習

就陽春耐可呼天作知己詎知天意難具論刻物
肖形神理在尺管疇令握真宰爾曹自取造化忌
天死炎荒託蓬壘侯死較先韓較後羅池之碑及
韓手教氏春秋鬼不饑桐鄉丘隴人應守潯水南
流即舊津黃蕉丹荔伏猶新手披蔓草荒祠下余
亦東西落魄人

弔劉參軍蒼墓

劉參軍獨鶚啾啾百鳥羣長鋏倚天氣吐雲巫咸

不下霄漢遠淚斷杞國人無聞欲扶靈轎上天門
虎豹狺狺坐九閭玉女投壺笑方劇衆星爭月光
猶繁且招龍比遊地下萬里投荒奄墮馬湘流東
去鵬南來長沙弔原君泣賈生慚借劍阻尚方死
願裹屍棄中野雄虺封狐任九頭魂招不來粵山
赭劉參軍青山瘴癘多風雨化碧啼鵑一坏土土
偶何知便是君請看生氣摩靈氛

張義姑辭

臨桂人詳
列女傳

陳繼儒

有雛有雛六歲而孤無怙無恃如委道塗張氏垂
絕可奈何可奈何義哉姑處子不嫁之死靡他不
願為鳳凰翱翔井邊梧不願為鴛鴦遊戲水中蒲
但願雛長成身作白頭烏青春逝清夜徂抱兄子
淚血枯爾寒我襦爾饑我餬授爾句讀愛爾髮膚
娶婦生兒美且都孤兒活不知無母室女老不知
有夫險哉一縷千鈞扶程嬰李善何難乎吁噓兮
巾幗男子粉黛妖狐汝獨不聞桂林張義姑

經畧臺懷古

區龍正

越南西去古銅開牂牁之水何年至別有繡江遠
故臺臺自開元間樹幟南屏矗矗都嶠君大容虎
踞并起羣劃成千古英雄地往事升沉悵夕曛駱
駝壩龍巷軍九派滙師武臣當年節鉞知誰任五
莞芳名今尚聞間有漫叟為元氏輕裘緩帶羊叔
子文章已擅盛唐名南海泱泱分賜履忽憶蓮湖
面面亭風流易盡留芳芷行塵不隔荔枝紅楊灣

尚在楊妃死地靈人傑總一時銷越歇晉千江裏
由來荒裔亦無常一枰碁局等兒戲倏忽游移數
百秋山城遼絕如斗寄人風遐想京洛遺災蹀文
身差可異變閩化蜀總何人海濱鄒魯寧殊地曾
不見溝纓石釣魚臺千年人去鶴歸來南山壁立
還相對江流不盡溯復洄勲名幾度成消長徙倚
城頭玉漏催

廣西通志卷一百二十一